

玉清無上內景真經

大羅真天元天大聖后紫光天母下傳

爾時

元始至真大聖化生開天 以其大神通力 大智慧力 結造世界 配  
 合陰陽 主張造化 先於大梵真天玄空之中 化諸外象 以表內景  
 而分九氣 為東方木精之色 結化九氣丈人而君主之 在人為肝  
 為魂 次分七氣 為西方金精之色 結化七氣丈人而君主之 在人  
 為肺為魄 次分三氣為南方火精之色 結化三氣 丈人而君主之  
 在人為心為神 次分五氣為北方坎精之色 結化五氣丈人而君主之  
 在人為腎為精 四方餘氣 水火金木 分布中央為黃庭之色 結  
 化一氣丈人 而君主之 在人為脾為思 五臟含識 共具十真  
 十真之英 能成九轉 聚為丹藥 散為甘露  
 周旋上下 煉養百骸 沐濁留清 消陰鑄陽  
 復我太初 保我大全 出于崑崙 入于太淵  
 引其龍變 經於虎城 四氣和合 成我至真  
 衰殘易盛 耄耄還嬰 朽容再鮮 白髮重青

玉清無上內景真經

清微藏書閣

韻如鍾發 身如羽輕 盡更凡骨 飛昇上清  
 世之學士 立戒持定 而生智明 以其三力  
 永保億年 履輕清之氣 運定變化 以超仙也  
 左右二玄 無極真宰 以我此道 廣布天人  
 使其捨離無常之業 而入真一之妙 非老非死  
 湛寂常存

元始真尊於其七竅放大光明 照無量土 萬二千天百億人界 各以  
 自力散香雨華 而為貢奉 莫不欣悅 咸悟本心 爾時  
 玉清化宮於空玄中 忽見寶月光明 照映內外十虛 寶月之中 包  
 含紫炁之內 有一嬰兒 坐寶華臺 口放金光 發大玉音 而說偈  
 曰

一心生正定 萬象自然陳 逐方分五氣 五氣孕一靈  
 一靈通變化 結煉本來真 本真非有相 非有亦非無  
 兆能通此理 方悟攝塵珠  
 玄空之中 月光之內 玉嬰演教 天上天下  
 一時皆聞 莫不慧海湛然 業山摧毀 反觀內照

永契道真 仰望聖光 拜禮而去 敬信奉持

玉清無上內景真經竟

天運辛卯年巳月正一天師清微弟子洪鼎堅羅大英恭錄彙編  
徐小媛複校

玉清無上內景真經

清微藏書閣